

## Preface to the Mao text of the Book of Poetry P.1

### 毛詩序

《關雎》<sup>1</sup>，后妃之德也<sup>2</sup>，風之始也，所以風天下而正夫婦也。故用之鄉人焉，用之邦國焉。風，風也，教也；風以動之，教以化之。

詩者，志之所之也<sup>3</sup>，在心爲志，發言爲詩。情動於中而形於言，言之不足故嗟嘆之，嗟嘆之不足故永歌之，永歌之不足，不知手之舞之，足之蹈之也。

情發於聲，聲成文謂之音<sup>4</sup>。治世之音安以樂，其政和；亂世之音怨以怒，其政乖；亡國之音哀以思，其民困。<sup>5</sup>故<sup>6</sup>正得失，動天地，感鬼神，莫近於詩。先王<sup>7</sup>以是經夫婦，成孝敬，厚人倫，美教化，移風俗。

故詩有六義焉：一曰風，二曰賦，三曰比，四曰興，五曰雅，六曰頌。<sup>8</sup>上以風化下，下以風刺<sup>9</sup>上，主文而譎諫，言之者無罪，聞之者足以戒，故曰風。至於王道衰，禮義廢，政教失，國異政，家殊俗，而變風、變雅<sup>10</sup>作矣。國史<sup>11</sup>明乎得失之迹，傷人倫之廢，哀刑政之苛，吟詠情性，以風其上，達於事變而懷其舊俗者也。故變風發乎情，止乎禮義。發乎情，民之性也；止乎禮義，先王之澤也。是以一國之事，繫一人之本，謂之風；言天下之事，形四方之風，謂之雅。<sup>12</sup>雅者，正也，言王政之所由廢興也。政有小大，故有小雅焉，有大雅焉。頌者，美盛德之形容，以其成功告於神明者也。是謂四始<sup>13</sup>，詩<sup>14</sup>之志也。

然則《關雎》《麟趾》<sup>15</sup>之化，王者之風，故繫之周公。南，言化自北而南也。《鵲巢》《騶虞》<sup>16</sup>之德，諸侯之風也<sup>17</sup>，先王之所以教<sup>18</sup>，故繫之召公。《周南》《召南》，正始之道，王化之基。是以《關雎》樂得淑女，以配君子<sup>19</sup>，憂<sup>20</sup>在進賢，不淫其色；哀窈窕，思賢才，而無傷善之心焉。是《關雎》之義也。<sup>21</sup>

藝文書局胡克家 1809 重雕宋淳熙本《文選李善注》卷四十五